

欽定剿平粵匪方略

欽定剿平粵匪方略卷三十八 癸丑年

五月初八日

壬子

奕經奏言

臣

前在清江浦駐紮

將密雲兵一千名分駐黃河南北兩岸並會同
河臣楊以增就近布置嗣因賊竄臨淮徐州緊
要卽赴徐州防堵迨托明阿到浦接奉

諭旨無論何人所帶之兵迅卽帶往應援等因旋將分
駐清江浦之密雲兵五百名由托明阿抽帶前

往茲據琦善咨稱四月二十八日轉准安徽撫臣李嘉端咨開據報鳳陽府城被賊攻破急待援兵飛咨臣統帶官兵援剿臣自應先其所急擬卽帶密雲兵四百三十名趕緊拔營前往惟兵力太單難成隊伍如前路遇有徵調官兵可否由臣添帶數百名以資攻剿

同日楊以增奏言前奉

諭旨准臣調安徽留防山東兵二千名現僅陸續到浦
七百餘名經臣派往浮山口防守其餘各路官
兵均爲徐州安徽截留統計王營清江祇有密
雲兵五百名若再調出民心必先驚動關繫匪
輕茲接奕經咨會轉准琦善咨照迅速帶兵馳
往鳳陽援剿在奕經旣奉調派不敢不拔營前
往惟清江最要之地軍火糧餉所儲且平日商

賈輻輳久爲賊所覬覦豈可不留一兵現據道府廳縣會稟以清江喫緊請留兵保衛等情臣維賊之慣技在避實擊虛我之大患在顧彼失此以清江如此重地當萬分喫緊之時不容稍有破綻必待賊至而始爲防則已措手不及是清江之兵應添而不應減矣經之在清江當留而不當去惟有仰懇

皇上天恩准留奕經駐紮清江民心藉資鎮定均奏入
上命軍機大臣傳諭奕經楊以增曰賊匪竄擾懷遠蒙
城該處東西兩路與宿亳接壤昨降諭旨令托明阿
奕經確探何路緊急卽由何路督兵進剿茲據奕經
奏已帶密雲兵四百餘名趕緊拔營前赴援剿著卽
迅速兼程前進與托明阿所帶各兵會合兵力自不
致單弱並與周天爵等協力夾擊不必再折回清江

徒多往返至清江浦地方爲淮揚後路水陸衝途自
宜扼要嚴防著楊以增將現有之山東官兵及本境
防兵與所募練勇酌量分撥妥爲防守琦善總統北
路諸軍慧成恩華所帶之兵均歸調遣該河督卽咨
商該大臣就近於續調之兵酌撥調度或一面與李
德熟籌彼此互爲聲援呼應可期得力

同日周天爵呂賢基奏言據探四月二十八日

經撫臣李嘉端督飭署藩司奎綬及鳳陽府縣
各官帶領兵勇收復鳳陽府縣兩城並探得賊
匪從臨淮鳳陽竄至懷遠旋於三十日竄入蒙
城又於初二二等日竄至蒙城縣西北五十里
之西洋集並探聞該匪欲由亳州直抵汴梁等
語臣等查蒙城東北與宿州接壤距州城僅百
二十里西北與亳州接壤亦僅二百餘里今該

匪聲言欲往亳州雖詭謀多詐未可深信惟蒙
毫一水可通一至亳州則與河南之永城商邱
鹿邑等縣密邇距山東單縣亦止一二百里不
等是豫東二省不可不嚴加防守臣呂賢基卽
商令提督善祿帶兵由宿州西路直抵亳州將
該匪痛加剿洗臣周天爵分撥兵勇沂渦河而
上追剿並飛咨河南撫臣督兵赴亳鹿交界地

方迎擊以期迅滅醜類奏入

上諭曰昨已有寄諭令汝等相機截剿矣今看汝等奏報情形此股賊匪尙不至謀而後竄果能奮勇殲戮無難掃蕩也

初九日癸丑周天爵奏言臣前聞賊警時卽於渦

河邊築戰牆一道並營壘三座又復請兵募勇三路進攻臨淮孰意四月二十一日賊破鳳陽

二十六日由僻道直趨懷遠搶渡渦河焚掠二
十八日賊聞臣帶兵在途恐被追及卽於是夜
舍舟登陸西走蒙城其尾股之賊悉被兵勇擒
斬無遺惟土匪四面紛起假稱鄉勇入城焚掠
甚於粵匪臣於初二日渡河擒獲土匪范三等
十餘人盡行正法並獲粵匪楊棕傳等五人供
稱賊之僞東王李姓更有林吉二姓爲大頭目

本欲北窺徐州因宿州有虎勇駐守不敢北來
改道由懷遠西趨蒙亳直走鹿邑而攻汴梁臣
竊思汴徐爲逆賊北窺要路處處皆有土匪響
應而皖省鳳潁一帶土匪尤多且橫臣卽日統
帶兵勇追剿至蒙亳境截其北犯宿徐之路並
沿途痛剿土匪杜其勾結一面分咨陸應穀駐
紮鹿邑托明阿帶兵由黃河南岸迅赴永城琦

善速撥黑龍江兵循渦淮兩岸而上以便三路
會剿至臣呂賢基仍帶同袁甲三等駐守宿州
並請將過境之陝甘兵暫留宿州以資堵禦西
安駐防之馬隊酌撥五百名交撫臣李嘉端在
滁州池河驛一帶駐紮另留署總兵吉昌帶固
原兵駐守懷城緝拏土匪惟臨淮係通宿徐驛
站臣旣西赴蒙亳則東路空虛亟請

飭下侍郎奕經帶兵迅赴徐邳一帶與李嘉端跨淮而
守既可遏南來之寇更免臣東顧之憂

周天爵又奏言據所獲粵匪楊棕傳等供稱正
賊不過千人裹脅雖有兩萬號令實不能行又
詢賊無大技不過驅難民於前敵至七八隊後
始是逆匪若以伏兵邀擊於後可以立盡惟臣
遠在宿州可以比保徐堯而不能兼顧邳宿專

治潁州土匪而不能兼顧廬鳳自應變通會勘
方合機宜

同日李嘉端奏言臣於五月初三日接據江浦
縣曾勉禮稟稱南岸逆船多隻行至西江口遇
向榮水師礮船暫停北岸旋即揚帆駛過三山
江面探馬追至烏江地方回報逆船已儘數上
駛等語伏查烏江爲和州東界其西界則裕溪

口臣與周天爵呂賢基等屢將此地緊要附摺
聲明祇因賊在下游相距尙遠論其緩急自應
以防守浦口爲先正在設法布置而臨淮之賊
北竄方待粵兵以資追剿不圖又有此股竄擾
江干查粵兵卽日可抵廬郡安慶兵應仍留守
皖城臣擬令粵兵赴巢縣一帶防堵而以咨留
過境之副將沙兆龍統之復調回緝匪之李登

洲偕李鴻章各帶練勇前往協勦誠以裕溪爲
廬郡門戶卽爲南北咽喉必須於此堵住賊船
庶現在北竄之賊不致再添羽翼均奏入

上命軍機大臣傳諭周天爵呂賢基李嘉端曰前據向
榮等奏觀音門外各船與賊起釁各將船隻燒燬統
計不下一千數百隻遣散水手萬餘人此次揚帆駛
過三山江面各船或者卽係向榮等前次遣散之船

亦未可知惟賊情詭譎現在江甯防剿嚴密難保不
意圖上竄且更恐乘虛北來冀與現竄懷蒙之賊互
爲勾結已諭向榮等確切查探隨時嚴防李嘉端擬
令副將沙兆龍統帶粵兵赴巢縣一帶防堵復調回
李登洲李鴻章等各帶練勇前往協剿卽著該撫嚴
飭該員認真堵截毋任賊匪北竄至臨淮賊匪現由
懷遠直趨蒙城一帶周天爵卽日統帶兵勇截其北

犯宿徐之路並沿途痛勦土匪杜其勾結一面飛咨陸應穀托明阿琦善三路派兵會勦又酌撥陝甘馬步各兵交呂賢基李嘉端吉昌等統帶分駐以資防勦布置尙屬周妥已諭令陸應穀托明阿奕經等趕緊探明賊蹤迎頭截擊據稱此股真賊不過千人其餘多係裹脅沿途逃散不少該侍郎總宜相機設法將真賊悉數殲擒餘匪自易埽蕩並著呂賢基李嘉

端嚴密堵截飭屬緝拏土匪勿令勾結爲患所稱拏獲楊棕傳等供稱李姓及林吉二姓爲大頭目與向榮前奏情形相同著向現獲各犯訊明林淵詳李開芳吉汶元等係何處人何時從賊詳細具奏

上又命軍機大臣傳諭陸應穀曰據周天爵奏逆賊竄擾懷遠蒙城欲由亳州入豫又稱現獲之長髮賊楊棕傳等供正賊不過千人裹脅雖有兩萬餘人號令

實不能行若以伏兵邀擊於後可以立盡等語此股賊匪勢不甚大若能痛加剿洗則真賊就戮餘黨立散軍興以來總誤於守而不戰處處設防反致節節落後賊勢日張伊於胡底著陸應穀督飭文武帶兵星速前進合力兜剿並知會周天爵善祿托明阿奕經江忠源等各帶精兵分路剿捕務期迅速殄滅勿誤事機斷不可以防堵爲名將有用之兵零星散處

轉歸無用也

上又命軍機大臣傳諭奕經托明阿曰逆賊竄擾懷遠
蒙城欲由亳州入豫周天爵卽日追至蒙亳截其北
犯之路此股賊匪勢不甚大若使剋期攻剿何至蔓
延爲患現由滁鳳擾及懷蒙意圖紛竄儻再遷延時
日賊勢漸熾剿滅愈難奕經托明阿均已督兵赴皖
現據周天爵奏稱已咨托明阿由黃河南岸迅赴永

城突經迅赴徐邳一帶遏賊南來之路著該侍郎將
軍等卽與周天爵隨時知照扼要堵截務期合力殲
除勿任竄逸

初十日

甲寅

向榮許乃釗奏言臣等自四月二十

二日散遣觀音門外被脅各船仍一面檄調下
游艇船二十號駛赴上游幫同礮船堵禦以壯
聲勢茲據都司楊煥章等稟稱二十七日東北

風起忽見夾江大江有船數十號揚帆直上當
經我軍礮船擊壞多隻餘皆逃回隨又續到百
餘號見我兵船開礮均卽落帆搖手挨近北岸
午刻以後風勢愈大又有船千餘號鳴鑼揚帆
盡擁直前迨三十日賊船出當塗駛至蕪湖礮
船遂分十餘隻駐守蕪湖江口防其竄擾臣等
先慮賊船上竄者一爲駛往太平府北岸直趨

蕪湖與鳳陽股匪會合滋擾一爲竄踞太平府城西岸或從蕪湖徑赴甯國阻截糧道窺伺糧臺或旁趨東壩竄擾蘇杭等處是以二十八日先派已革提督福興帶兵二千名二十九日續派參將孔廣順帶兵勇各一千名星夜馳赴太平蕪湖一帶進剿與前派守護糧臺及駐紮東壩各兵勇互爲聲援一面飛咨琦善等及安徽

撫臣李嘉端一體防範今據報賊船已越太平
蕪湖而上未知是何詭謀惟思賊與難民總以
有無焚掠爲斷今訪之沿江居民皆無焚掠等
事或係脅從思散亦未可知現當克復金陵十
分喫緊之際此等上駛賊船未知所往未便以
精銳將士徒事窮追轉致大營兵單且金陵爲
首逆負固之地拔其本根則枝葉自然萎謝臣

等現已飭各營置備攻具簡選精銳一有可乘之機卽當迅速克復不敢稍有遷延

同日署湖廣總督張亮基湖北巡撫崇綸奏言據探稱金陵城內賊匪多溷難民薙髮而出是其窮蹙思散確有可信現在金陵揚州鎮江三處均有大兵駐紮賊必不敢於兵多之處拌死狂竄惟浦口係北竄要道東壩係南竄要道東

西梁山係由江上竄要道儘三處守禦空虛恐
逆賊卽由此免脫又成不了之局江忠源現由
九江前進伏乞

指授機宜如臨淮一帶賊已就誅或無關緊要卽請

飭下該臬司擇要駐紮輔以重兵遏賊分竄尤爲得力
並請

旨通飭帶兵將官講求結營築壘之法使士卒有所憑

藉可以與賊相持庶戡定之功可計日待也

同日李嘉端奏言臣因廣濟事平將防堵宿松之兵調回時鎮臣玉山已至懷遠之上審地方四月二十八日聞該逆全數渡淮署藩司奎綬署知府裕恭卽於是日帶領守定遠之兵前往收復鳳陽而攻撲定遠之土匪亦經署令郭師泰擒獲多名正法現在定遠暫保無事惟該逆

北窻之路一由宿州至徐一由懷遠蒙壽至河南在在均關緊要宿州一路有周天爵堵禦兵力較厚懷遠一路雖有鎮臣駐守上窻隘口而單弱特甚臣現擬令李鴻章等選募鄉勇俟粵東兵一到卽親督前往協剿並移咨都統西凌阿由池河進兵以備夾擊至奉

旨撥給之兵四千名尙未據周天爵派到湖北臬司江

忠源亦尙未報入境合併聲明

同日楊文定奏言總兵陳世忠周士法統帶浙江師船二十隻先後駛至焦山經臣與浙江藩司麟桂總兵和春等議乘風順將艇船進據鮎魚套金山一帶斷賊瓜鎮往來之路浙師堵住焦山遏賊順流東竄之路迨二十八日東北風作頗稱順利乃和春麟桂忽奉向榮札文恐賊

匪回竄飭調和春親帶戰船二十隻前赴金陵
免兒磯地方堵擊和春遵札卽欲調船前往臣
亦有進克瓜州分撥師船直趨金陵之奏惟現
在瓜州賊船增多鎮江未復其艇船水勇均係
雇募原與兵丁不同聞欲調赴金陵俱以四面
受敵爲慮不肯前行麟桂隨於二十九日親赴
向榮大營稟商應俟議定再行分撥是日卯刻

風轉東南其勢甚大 臣以風色不可多得無論
應調何船必先乘時進剿隨差弁前往促戰和
春卽會商周士法陳世忠等進攻瓜州時提 臣
鄧紹良亦由山梁出隊各船卽起碇揚帆上駛
由甘露寺至大馬頭一帶皆有賊營開礮迎敵
各艇師直前近岸連照賊營開放槍礮該逆見
我師且攻且進將瓜州口外排列多船收入口

內我師從巳至申轉戰四時之久統計焚溺賊
船三十餘隻奪獲五隻生擒賊匪九名擊斃一
百餘名時因天晚北岸亦無兵勇接應隨即撤
船於金山上游停泊截斷江面使瓜鎮賊匪聲
息隔斷再行設法攻取但此處采入賊境深爲
可慮除飭各艇船嚴密防範並嗣後分船進攻
以示暇整仍撥回師船十餘隻往泊焦山上游

相爲援應均奏入

上命軍機大臣傳諭向榮許乃釗張亮基崇綸張芾曰
江甯觀音門外各船前經向榮等設法遣散千餘隻
並船戶水手萬餘人昨據李嘉端奏江南賊船乘風
駛過三山江面當諭令向榮等查明是否卽係遣散
船隻本日據奏自二十七日至三十日先後有賊船
千餘隻由金陵駛過蕪湖並未焚掠復據張亮基等

奏探據金陵城內賊匪多瀕難民薙髮而出等語或
係脅從思散或竟別有詭謀皆不可知已由該大臣
飛咨上游各督撫設法嚴查諒已一體防範此等裹
脅之衆並非甘心從逆地方官若能相機解散曉以
大義遣令回籍各營生理卽是化莠爲良之法儻操
縱失宜偵探不確或妄拏無辜難民轉任眞賊漏網
必致別生事端反墮奸計又據楊文定奏水師復獲

勝仗進據金山俾瓜鎮賊匪聲息隔絕辦理尙屬得手鄧紹良等業經移營逼近鎮城該大臣等務當趁此機會迅速督飭水陸各營將弁合力勦擊並設法杜賊勾結斷其往來之路則賊勢益孤兵威益壯自可指日克復也

上又命軍機大臣傳諭周天爵呂賢基李嘉端曰據李嘉端奏已將鳳陽收復定遠土匪亦擒獲多名惟該

逆北竄之路在在均宜嚴防等語現在呂賢基駐守
宿州周天爵馳赴懷遠一帶跟蹤追剿李嘉端卽可
統帶兵勇相機堵剿仍知照奕經托明阿陸應穀四
面兜撿互爲應援又據向榮奏被脅賊船乘風上駛
並無沿途搶掠之事賊情詭譎不可不防已寄諭向
榮並江西湖北督撫偵探防範著該撫飭令地方文
武一體嚴防勿使與竄擾懷蒙之賊暗相勾結是爲

至要

同日托明阿奏言臣查宿州逼近賊氛誠恐該
匪分遣奸細探聽虛實前經臣諄飭該官兵等
沿途訪拏旋據盤獲形跡可疑之劉元勝等供
係被逆裏脅乘便逃出逆匪現欲攻撲亳州等
詞查亳州西界豫省北達徐州東接宿州若我
兵一路攻剿彼必乘虛擾竄臣當與侍郎呂賢

聞

基貴州提督善祿晤商此股賊匪能分路截擊
使其腹背受敵可期速爲殲滅善祿隨於初六
日拔營趕由永城會帶該處駐紮官兵迎頭截
剿臣亦卽趕緊齊隊自宿起程由鐵佛寺偵探
截剿以遏北竄奏入報

同日察哈爾都統西凌阿正黃旗蒙古副都統

明慶墨爾根城副都統烏凌額呼倫貝爾總管
魁福奏言 臣等遵奉

諭旨帶領黑龍江兵二千名行抵江南浦口准琦善札
留該處防守三月十八等日有賊船數十隻泊
岸經 臣等帶兵攻擊三次四月初六日辰刻突
有賊船數千隻賊匪數千名各路攻撲 臣等正
在江岸帶兵巡查當卽列隊與賊接仗賊匪愈

聚愈多官兵奮力攻擊至申刻箭枝藥丸施放殆盡是以退回東葛驛昨准琦善奏奉

諭旨將臣等暫行革職帶罪追勦嗣准琦善飭令由浦

口直赴滁州清流關至河南汴梁城一帶探訪

賊蹤追勦臣等遵卽折至六合縣於四月二十

一日至清流關二十二日有賊匪三千餘肆行

抗拒臣等列陣衝擊槍箭並發賊始潰敗臣等

督兵且追且殺至三十餘里之磨盤山因天色
已晚不能前行計殺賊八百餘名生擒數十名
奪獲旗幟槍礮多件羸馬百餘匹嗣偵探賊匪
占踞臨淮關隨卽帶領馬步兵丁於五月初一
日至臨淮聞賊匪已西竄懷遠縣城當卽啟行
於初四日行抵上洪備船過渡追至懷遠縣探
得賊匪已入蒙城縣境現在帶兵跟蹤進剿不

敢稍涉遲延臣等伏思黑龍江官兵於二月二十七日行抵浦口至三月二十九日領得一月口糧至四月十五日僅由六合縣糧臺每兵領口糧銀一兩五錢所領箭枝業經用罄前經六次行文琦善飭催仍未解到鍋帳一項於四月初五日始據糧臺解到帳桿等物尙未到齊是以未能紮營於初六日打仗之際鍋帳多有遺

失沿途均係露處臣等追賊前進距揚州大營
愈遠誠恐一切戰具立時難以趕解合無仰懇
天恩飭下安徽河南經過地方將應用箭枝藥丸馬匹
口糧就近接濟以免缺乏而資進剿奏入

上諭內閣曰西凌阿以都統大員統帶黑龍江官兵經
琦善派令與明慶烏凌額魁福駐紮浦口防剿逆匪
是其專責乃於賊船竄擾之時並不能督兵奮力攻

擊輒行退回並將鍋帳遺棄可見西凌阿等漫無準
備爲賊所襲前據琦善奏當經降旨暫行革職仍
責令帶罪剿賊以觀後效該革員等於奉到嚴旨後
應如何愧懼感奮稍贖前愆乃以軍械馬匹糧餉不
足曉曉置辯藉以掩其敗走之罪且所稱與賊接仗
及追剿情形支離掩飾情狀顯然近來帶兵大員賊
來不擊賊去不追幾成錮習猶復於敗退之後藉詞

誘過他人昧良取巧實堪痛恨若不嚴行查辦懲一
警百何以肅軍律而服人心西凌阿等摺著發交琦
善按照所陳逐一詳查如係飾詞卸罪卽著按律定
擬具奏候旨懲辦

同日李德奏言前以賊擾滁州應援較緊臣於
四月二十四日由兗州起程二十六日馳抵韓
莊覈計兵勇足敷防剿旋於二十七日馳抵徐

州隨卽履勘北岸河隄見水勢奔騰中流尤極
洶湧洶爲天塹之險其渡口船隻均有兵役稽
查仍飭該文武認真經理一面酌量安營地段
互相策應二十九日行至睢甯之小順河集適
途遇徐州鎮臣百勝前赴新任面相籌商總期
兩岸聲息相通防守庶可得力此布置徐州一
路之大概也迨三十日抵宿遷之順河集地多

窪下惟黃河北岸護隄高寬形勢曲折去該縣城西門渡口不過二里許分投設伏均屬得宜臣復相度往還舍此無以扼要所有山西後起官兵應分撥宿遷渡口並山湖兩路總區爲王家營及重興之後應臣卽在該處行營駐紮此又布置宿遷一路之大概也然臣所慮者不在外患之遠來而在內奸之竊發比聞滁州鳳陽

相繼失守多係土匪假託粵賊所致又聞皖省
泗州一帶土匪亦多距宿遷僅一百六七十
里防範尤應嚴密卽徐州糧臺移紮來宿亦當
力加保衛臣惟有竭盡心力隨時相機而行斷
不敢稍涉大意奏入

上諭曰布置俱妥尤能不分畛域協同緝拏土匪更屬
甚善

十二日丙辰陸應穀奏言臣於初五日辰刻據探

賊於初四日未刻竄至亳州州城失守難民紛
紛逃出現在大兵陸續趕到宋集臣亦卽日馳
赴宋集以便進剿查亳州失守河南門戶已失
自須厚集兵力一鼓克復方能保全豫省大局
惟臣所帶兵勇不過三千餘名誠恐衆寡不敵
致滋他虞查現在調赴皖省之兵由歸德前進

者尙有漢中兵九百八十名宜君營兵六百五十名甯夏馬隊五百名尙在永城宿州之間此時賊匪全股趨豫臨淮情形稍寬而豫省永城鹿邑柘城路路可通防堵萬分緊要臣已飛檄調令全赴宋集以爲進剿之用並請

飭下周天爵善祿星夜速帶兵勇赴亳會剿

陸應穀又奏言臣統帶各營官兵駐紮宋集初

六日早探報亳州逆匪陸續出城臣卽飛飭副將錫普常阿等整隊迎截在升家樓地方遇賊前隊該副將等督兵分爲兩翼施放連環槍礮該逆開礮拒敵相持兩時殲斃賊匪無數臣聞前隊開仗卽令都司常啟雲督同梁澍業舒長山姜簾各帶兵勇分爲三路嚴陣以待初七日又有賊匪撲營當飭該兵勇等施放槍礮殲斃

生擒共一百數十名又續據錫普常阿等稟報
本日辰刻復有逆匪三千餘名分竄歸德當卽
出兵邀擊我兵戰至一時有餘該匪力不能支
殲斃賊匪六百餘名生擒長髮大頭目杜汶學
張泳祐周夢蘭周鍾義四名均係廣西湖南人
卽行正法惟探有大股已由柘城之胡相城直
竄汴梁情形緊急飛調錫普常阿等迅速折回

臣卽督同相機堵截並調永城駐紮之兵折回
歸德以防東竄之路並請

飭下直隸山東督撫臣一體嚴防現在直隸藩司張集
馨駐紮臨洺關伏祈

飭令該司將所帶兵弁馳赴豫省黃河北岸以爲聲援
奏入

上命軍機大臣傳諭陸應穀曰現在亳州失守大股賊

匪竟由柘城直撲汴梁已成滋蔓之局河南情形緊急該撫已調錫普常阿等迅速折回督同堵截並調永城駐紮之兵折回歸德以防賊匪東竄之路一切調度自應相機辦理此股半係裹脅之衆真賊無多且後路無援各路官兵必可迅速趕到務當會同夾擊剋期殲滅萬勿令再有蔓延張集礮現駐臨洛關已諭訥爾經額轉飭該藩司赴黃河北岸惟防守直

隸要隘亦關緊要張集馨能否前往尙難豫定該撫
責在守土當此萬分喫緊之時總當力籌防剿保全
大局慎勿專待援兵致誤事機

上又命軍機大臣傳諭琦善陳金綬勝保慧成曰據陸
應穀奏亳州失守並聞賊由柘城直竄汴梁等語賊
匪竄出浦口不過二三千人又經六合官兵擊敗人
數愈少如果西凌阿等認真堵截何至裹脅蔓延深

入皖境現聞欲撲汴梁若再逼近黃河豫省兵單愈
難堵禦該大臣統領江北諸軍自應統籌全局乃頓
兵堅城之下坐使分股餘匪任意衝突由皖而豫所
謂調度者安在慧成督兵前赴揚州現在如何與琦
善等籌畫克復之策若再日久相持必致顧此失彼
未知該大臣等計將安出勝保帶兵赴皖是否業已
起程係由何路進剿此時賊情緊急萬不可再有濡

滯致誤事機

上又命軍機大臣傳諭訥爾經額曰據陸應穀奏賊陷
亳州大股由柘城直竄汴梁等語河南省城濱臨大
河沿河考城等處與直隸之東明長垣接界迤北之
武安等處亦與直隸之邯鄲磁州一帶壤地相連直
隸爲畿疆重地亟應嚴密設防且爲豫省後路聲援
著訥爾經額體察情形何處緊要卽於何處撥兵防

堵如須親自出省卽著迅速奏明前往駐紮陸應穀
奏請飭張集馨馳赴豫省黃河北岸之處亦著該督
酌量辦理若該司出境能與豫省聲勢聯絡則嚴扼
黃河亦足以保衛直隸毋得稍存畛域

上又命軍機大臣傳諭恩華曰前以賊竄蒙城降旨令
恩華於沿途確探賊蹤儻全行西竄卽馳往豫境會
同陸應穀督剿本日陸應穀奏亳州失守大股由柘

城欲竄汴梁等語河南情形現在緊急著該尙書確探賊蹤竄往何處卽由何處進剿該匪本無甚伎倆總由我兵未與接仗致令紛竄若督兵痛加剿洗定易撲滅務當相機前進及早殲除托明阿奕經等亦已諭令帶兵往剿矣

上又命軍機大臣傳諭周天爵呂賢基李嘉端曰現在亳州失守賊匪竄入豫境大股由柘城直竄汴梁此

股賊匪前無援引後無接續何以由滁州直趨蒙亳
未聞該省官兵與之接仗所過城池到卽失陷亦未
聞地方官如何守禦殊不可解現旣全股闌入豫境
其皖省有無匪黨盤踞急應迅速搜捕毋令更生枝
節周天爵諒已抵亳或應跟蹤追剿或應留辦土匪
嚴防該匪回竄之路務須斟酌緩急毋失事機呂賢
基駐守宿州李嘉端在廬鳳一帶均須備豫不虞毋

令江甯揚州竄出之賊復來窺伺儻賊來不能截擊賊去亦不復追擒專以收復各城紛紛馳報於事何濟本日已諭令奕經托明阿善祿等各帶所領官兵追賊直赴豫省協剿皖省境內專責成該侍郎等防禦外侮肅清擒匪毋得再有疏虞

上又命軍機大臣傳諭奕經托明阿善祿曰前有旨令奕經迅赴徐邳一帶托明阿迅赴永城此時皖境之

賊直撲豫省汴梁切近大河該撫雖經帶兵折回第
該省兵力甚單賊勢猖獗急須大兵會合追截方不
至過河北竄善祿自宿至亳諒已得信奕經托明阿
現已行抵何處均著於接奉此旨後迅速帶領官兵
兼程馳赴河南沿途探明賊蹤所在疾趨赴援萬不
可稍事遷延

上又命軍機大臣傳諭舒興阿張祥河曰現在賊陷亳

州大股由柘城欲撲汴梁該省防兵單弱已諭令恩華奕經托明阿善祿等各統官兵赴豫協剿但賊蹤靡定往往避實擊虛陝西與河南毗連處所防兵甚少著舒興阿等察度情形應如何派撥援應豫爲設防如河南省城有警該督應親往何處駐紮可期調度得力卽著一面奏聞一面前往但當嚴密籌備毋庸過事張皇致駭民間觀聽

上又命軍機大臣傳諭李德曰現在亳州失守並有大股直竄汴梁已諭令托明阿等迅速前往截剿山東與豫省唇齒相依該撫現駐宿遷昨奏察看黃河北岸及分布徐宿各情形辦理尙屬妥善惟逆情詭譎往往乘虛肆擾著李德察看何路緊要卽於何路設防仍須兼顧黃河渡口勿令稍有疏虞

上又命軍機大臣傳諭江忠源曰前因賊竄蒙城豫省

防勦喫緊有旨令江忠源迅速帶勇赴勦現在賊自
亳州分竄歸德復有大股由柘城直撲汴梁之信是
各路援兵皆已落後該臬司所帶練勇亦未能徑出
賊前豫省兵力單弱深爲可慮著江忠源迅速兼程
前進確探賊蹤併力截擊此股賊匪無大伎倆總由
我兵未與接仗致令竄突該匪避實擊虛明知我兵
分道赴援每多緩不濟急該臬司熟悉賊情果能間

道出奇乘其不意痛加勦洗當可一鼓殲擒賊情變
幻殊難遙度無論皖豫何路緊急該臬司卽迅速應
援毋失事機